

ԱՌԱՋԻՆ ՄԱՄԻԿՈՆՅԱՆՆԵՐԸ ԲՅՈՒՋԱՆԴԱԿԱՆ ԱՐՔՈՒՆԻՔՈՒՄ

Պատմ. գիտ. դոկտոր Չ. Մ. ԲԱՐՔԻԿՅԱՆ

Արևելահռոմեական կայսրության և Սասանյան Իրանի միջև Հայաստանի առաջին բաժանման (387 թ.) նախօրյակին հայոց թագավոր Արշակ III Արշակունին իր ողջ ընտանիքով հեռացավ Հայաստանի ապագա պարսկական մասից և հաստատվեց Հռոմեական կայսրության տիրապետության տակ անցնելիք Հայաստանում, չլա համարեալ նուազ կողմանն տիրել՝ և ծառայել քրիստոնեայ թագաւորի, քան յօլովից իշխել՝ և մտանել ընդ լծով հեթանոսացա՝: Պարսկական տիրապետության տակ անցած Հայաստանից արևմուտք գնացին նաև մի շարք նախարարական ընտանիքներ, որոնց ներկայացուցիչները ծառայության մտան հռոմեական (հետագայում՝ բյուզանդական) արքունիքում և բանակում:

Փաստերը վկայում են, որ հայ ազնվականության մուտքը Բյուզանդական կայսրության արքունիքն ու բանակը սկսվեց շատ ավելի վաղ, քան մենք կարծում էինք՝ հենց 385 թ. անմիջապես հետո: Այդ բանի օգտին են վկայում այնպիսի վստահելի ու ճշմարտապատում աղբյուրներ, ինչպիսիք են Թեոդոս II-ի (408—450 թթ.) և Հուստինիանոս I-ի (527—565 թթ.) Դատաստանագրքերը (Codex Theodosianus և Codex Iustinianus), որոնց սույն հոդվածում շրջանառության մեջ դրվող տվյալներ հայագետների ուշադրությունից չլիքվել են, իսկ բյուզանդագետները չեն գնահատել ըստ արժանվույն:

Մենք մի այլ առիթով¹ անդրադարձել էինք ականավոր գիտնական Ն. Ագոնցի դատողություններին Բյուզանդիայում ծառայության մտած հայ ազնվականության վերաբերյալ, որոնց համաձայն ճշգրիտ այն հայերը, որոնք դերակատարներ են հանդիսանում բյուզանդական պատմության մեջ, գրեթե բացառապես պատկանում էին հայ ազնվականության դասին²: Սակայն հարցը նրանում է, որ Հայաստանում քաջ հայտնի նախարարական ընտանիքներից և ոչ մեկը³ բյուզանդական աղբյուրներում հանվանե չի հիշված: Այդ առնչությամբ մենք մեջ էինք բերել նաև Ն. Ագոնցի իրավացի խոսքերը, թե ճշգրիտ բյուզանդական հայերի տոհմական ծագումը դժվար է որոշել հաստատապես, եթե օգնության չեն գալիս հայ աղբյուրները դրական ցուցումով⁴: Ուսումնասիրողները աշխատում են որոշել Բյուզանդիայում աչքի ընկած հայ գործիչների տոհմանունը նաև ելնելով այն հանգամանքից, որ նախարարական տները տոհմական անուններ ունեին մի հայտնի չափով յուրահատուկ, որոնց միջոցով կարելի է երբեմն որոշել թե ով ո՞ր տոհմին էր պատկանում⁵: Գիտնականը ավելացնում է, թե չհաճախ անունները փոխվում էին ամուսնության

¹ Մովսիսի Խորենացույ Պատմութիւն Հայոց, աշխատութեամբ Մ. Արեղեան և Ս. Յարութիւնեան, Տփղիս, 1913, գիրք Գ, գլ. 42, էջ 510:

² Տե՛ս «Պատմա-րանասիրական հանդես», 1985, № 4, էջ 135:

³ Ն. Ագոնց. Պատմական ուսումնասիրություններ. Պարիս, 1948, էջ 495:

⁴ Բացառությամբ մեկի՝ Գեոմիների, որի մասին տե՛ս մեր հոդվածը «Պատմա-րանասիրական հանդեսում» (1985, № 4):

⁵ Ն. Ագոնց. նշվ. աշխ., էջ 486:

⁶ Նույն տեղում:

հետ, որով ավելի դժվարանում է օգտվել անունների ուղեցույցից»⁷։ Այդ վերապահությունը, սակայն, որ միանգամայն արդարացի է հետագա դարերի կապակցությամբ, մեր ուսումնասիրած ժամանակաշրջանին չի վերաբերում, քանի որ սույն հոդվածում խոսք է գնալու հայ ազնվականության՝ Բյուզանդական կայսրության մեջ ծառայության մտնելու նախասկզբնական շրջանի մասին, երբ խառն ամուսնությունների վերաբերյալ դեռ շուտ է խոսել։

Թեոդոս II-ի Դատաստանագրքում այդ կայսեր արքունիքում 414 թ. տակ հիշվում է ոմն Մուշեղ (Musellios), ամենայն հավանականությամբ՝ Մամիկոնյան։ Նա ուներ պրեպոզիտոսի բարձր պաշտոնը⁸։ Հայաստանի պարսկական մասում Արշակունյաց հարստության վերացումից (428 թ.) ընդամենը 14 տարի առաջ⁹ Բյուզանդիայում հայ բարձրաստիճան գործչի հանդես գալը վկայում է, որ նա (կամ նրա ծնողները, ընտանիքը) ամենայն հավանականությամբ 385 թ. Արշակ III շքամբում անցել է Հայաստանի արևմտյան մասը։ Մովսես Խորենացին պարզ ցույց է տալիս. «Գնացին զհետ նորա (Արշակայ—Հ. Բ.) հանդերձ կանամբք և որդւովք և նախարարութիւնք որ ի բաժնին Շապհոյ (պարսից արքայից արքայի—Հ. Բ.) թողլով գիւրաքանչիւր արարս և զգիւղս և զգաստակերտս»¹⁰։ Կասկած չի կարող լինել, որ Արշակ III-ի հետ զնացող նախարարների թվում էին և Մամիկոնյանները։ Եթե նկատի ունենանք այն հանգամանքը, որ Հայաստանի պարսկական մասի թագավոր Խոսրով IV-ը (385—388 թթ.) իր զորքերի սպարապետ նշանակեց Սահակ ասպետին, որն անցյալում գնացել էր Հայաստանի արևմտյան մասը և անսալով պարսից Շապուհ արքային վերադարձել Խոսրով IV-ի մոտ, այսինքն սպարապետության պաշտոնը տվեց Բագրատունիների նախարարական ընտանիքի անդամին, ապա պարզ է, որ հայ Արշակունիների սպարապետության գործակալությունը գլխավորող Մամիկոնյանները Արշակ III-ի կողմն էին անցել։ Հայտնի է, որ նրանցից ամենաերևելին նշանավոր Սամուել Մամիկոնյանն էր, որ առանց վարանելու սպանել էր քրիստոնեական հավատն ուրացած և զրադաշտականությունն ընդունած հորն ու մորը¹¹։ Մովսես Խորենացու տվյալներով, երբ Արշակ III-ի և Խոսրով IV-ի միջև պատերազմ բռնկվեց¹², Սամուել Մամիկոնյանը պատերազմում էր Արշակի կողմից, որովհետև նա Արշակի ստերիմն էր։ Հետաքրքրական է նշել, որ Արշակ III-ի մահից (390 թ.) անմիջապես հետո Հայաստանի պարսկական մասի թագավոր Խոսրովը նամակով դիմեց Արշակի հետ հեռացած նախարարներին, կոչ անելով վերադառնալ։ Նախարարները ընդառաջեցին նրա կոչին, քանի որ Բյուզանդիայում իրենց սպասելիքները չիրականացան. «Տեսնալ նախարարացն Հայոց,—գրում է Մովսես Խորենացին,—եթէ ոչ կացուցին Յոյնք ի վերայ նոցա թագաւոր ...խորհեցան կամաւ հնազանդել թագաւորին Խոսրովու»¹³։ Խոսրովի մասն անցան բոլոր նախարարները, բացառությամբ հիշյալ Սամուել Մամիկոնյանի, ասել է՝ և նրա ընտանիքի։ Սամուել Մամիկոնյանը պատճառներ ուներ չվերադառ-

⁷ Նույն տեղում։

⁸ Theodosiani Libri XVI cum Constitutionibus Sirmondianis edidit adsumpto apparatu P. Kreugeri Th. Mommsen. Vol. I, Pars Posterior, Textus cum apparatu editio secunda Lucis ope expressa. Berolini, 1954, XI, 28, 9.

⁹ Իրականում 14-ից էլ պակաս, քանի որ Մուշեղի հիշատակությունը 414 թ. դեռ չի նշանակում, որ նա պրեպոզիտոսի պաշտոնին տիրացավ հենց այդ թվականին, ոչ էլ որ նա Բյուզանդիայում իր կարիերան սկսեց հենց այդպիսի բարձր պաշտոնով։

¹⁰ Մովսես Խորենացի, Գ, 44, էջ 313։

¹¹ Մովսես Խորենացի, Գ, 48, էջ 319։ Հմմտ. Փաւստոսի Բուզանդացու Պատմութիւն Հայոց. Վննտիկ, 1933, էջ 185։

¹² Հ. Մանանդյանը Խորենացու վկայությունն այս պատերազմի մասին անստույգ և անարժանա՝ ավատ է համարում (Քննական տեսություն հայ ժողովրդի պատմության. Հ. Բ., մասն Ա, Երևան, 1957, էջ 239), թեև այլ պատմաբաններ չեն կասկածում իրողությանը։

¹³ Մովսես Խորենացի, Գ, 48, էջ 317։

նախու պարսկական Հայաստան, Քբանգի էր սպանեալ նորա զհայր իւր Վարդան յաղագս ուրացութեան, և զմայր իւր Տաճատուրհի¹⁴, և երկնշելով ի Պարսից և ի քեռեաց իւրոց Արծրունեաց՝ ոչ իշխէր զատշել ի Յունաց»¹⁵։ Սամուելը, ձեռք գցելով հայ նախարարներին ուղղված խոսքովի նամակը, ինչպես և նախարարների զրած պատասխանի պատճենը, զգառուցեալ ի նոցանէ (այսինքն՝ մյուս նախարարներից—Հ. Բ.) զնաց առ կայսրն Արկադ¹⁶։

Ասվածից չի կարելի եզրակացնել, թե Մամիկոնյանները վերջնականապես մնացին Բյուզանդիայում։ Բյուզանդիայում մնաց, հավանաբար, Սամուելն իր ընտանիքով, քանի որ շատ շանցած Մամիկոնյանները պիտի գրել-խափորեին պայքարը Սասանյան Իրանի դեմ 451 և 482—484 թթ., 571 թ., ապա և բազմաթիվ հերոսամարտեր արաբական տիրապետության դեմ։ Բյուզանդիայում, համեմայն դեպս IV դարի վերջին և V դարի առաջին կեսին գործում էին Սամուելի ընտանիքի անդամներն ու շառավիղները։ Սամուել Մամիկոնյանի հետ կապված դեպքերը տեղի ունեցան 390 թ. հետո, բայց ոչ 395 թ. առաջ, քանի որ Արկադիոս կայսրը, որին դիմեց Սամուել Մամիկոնյանը, սկսեց թագավորել 395-ից սկսած։

Արկադիոս կայսրը (395—408 թթ.) Սամուել Մամիկոնյանին, ինչպես սպասելի էր, ընդունեց շատ սիրալիր։ «Իսկ Արկադեայ,—դրում է Մովսես Խորենացին,—բարի արարեալ նմա, հրամայէ զհաւասար թղթոցն (խոսքով թագավորի նամակը Բյուզանդիա անցած հայ նախարարներին և նրանց պատասխանի պատճենը—Հ. Բ.) հեղէն գրով ի դիւանի իւրում դնել, զի պահեսցին յիշատակք ազգաց ապստամբողաց. որ կայ մինչև ցայսօր»¹⁷։

Այս դեպքերից անմիջապես հետո, ահա, 414 թ. բյուզանդական կայսրերի արքունիքում ենք տեսնում պրեպոզիտոս Մուշեղին։ Պրեպոզիտոսը կայսեր սենեկապետն էր։ Դիոկլետիանոս կայսեր ժամանակ կոչվում էր a cubiculo, այնուհետև՝ praepositus sacri cubiculi կամ praepositus sacri palatii, հետագայում՝ մեծ կիտոնիտ¹⁸։ Նա շատ ազդեցիկ անձնավորություն էր պետության մեջ։ Նախապես մտնում էր respectabiles դասի մեջ, Թեոդոս I-ի ժամանակ ստացավ illustris-ի բարձր պատվաստիճանը¹⁹։

Պրեպոզիտոսի իրավասությունները շատ ավելի լայն էին, քան կարելի է եզրահանել՝ ելնելով նրա սենեկապետ լինելու հանգամանքից։ Նա ուներ նաև ֆիսկալ իրավունքներ։ Դա երևում է Հոնորիոս և Թեոդոս II կայսրերի 414 թ. հրապարակած այն հրովարտակից, որի մեջ հիշված է խնդրո առարկա Մուշեղը։ Հրովարտակը վերաբերում է ազնվականության և կուրիալների՝ կայսերական զանձարանին ունեցած պարտքերի վճարման հետաձգման հարցին։ Թեև այն ի գործադրություն հասցեագրված է պրետորյան պրեֆեկտ Անթեմիոսին, բայց ուղղված էր նաև Իլլիրիա և Արևելք դիոցեզների բոլոր պրովինցիաներին և դրա դրույթների ի կատար ածելը դրվում էր նաև հիշյալ Մուշեղի վրա, որի իրավասությունները, ամենայն հավանականությամբ, տարածվում էին Արևելք դիոցեզի սահմաններում։

¹⁴ Փավստոսի տվյալներով Սամուելի մայրը կոչվում էր Որմիզդուխտ և նա պարսից Շապուհ արքայի բույրն էր (էջ 185)։

¹⁵ Մովսես Խորենացի, Գ, 48, էջ 319։

¹⁶ Նույն տեղում։

¹⁷ Նույն տեղում։

¹⁸ Կիտոնիտը՝ հանդիպում է հայկական աղբյուրներում։ Կիտոնիտ է կոչված Գրիգոր Մագիստրոսը Կեչառիսի 1051 թ. արձանագրության մեջ։

¹⁹ *See* R. Guillard. Le Prépositus.—Recherches sur les Institutions byzantines, t. I, Berlin—Amsterdam, 1967, p. 333. Իլլյուստրիոսի պատվաստիճանը կրող մի այլ հայ հիշվում է Ալամանի 637 թ. արձանագրության մեջ, *See* Կ. Կոստանյան. Վիմական տարեգիր. Ս. Պետերբուրգ, 1913, էջ 1։

Անցնենք պրեպոզիտոս Մուշեղի անձնավորությանը: Նրա ազնվականական ծագումը, կրած անունը վկայում են նրա հայ լինելու և Մամիկոնյան նախարարական ընտանիքին պատկանելու մասին: Մուշեղը, ինչպես ասվեց, պրեպոզիտոսի բարձր պաշտոնը պիտի ստացած լիներ 414-ից առաջ և մինչև նման բարձրության հասնելը բյուզանդական արքունիքում պիտի զբաղեցրած լիներ ավելի ցածր պաշտոններ: Արդ, տրամաբանական չէ՝ ենթադրել, որ նա Մամուել Մամիկոնյանի հետ պիտի սերտ ազգակցական կապ ունեցած լիներ, որ Արկագիոս կայսրը, ի հատուցումն Մամուել Մամիկոնյանի՝ կայսրությանը ցուցաբերած հավատարմության ու մատուցած ծառայությունների: Նրա և նրա ընտանիքի այլ անվանի անդամների առջև քաղաքական լայն ասպարեզ պիտի բացած լիներ, այդպես պիտի վարված լիներ նաև Արկագիոսի որդի և ժառանգ Թեոդոս II-ը: Մուշեղը Մամուել Մամիկոնյանի որդի՞ն էր, եղբայրը՞, ժամանակագրական տվյալները ապա և ազգակցական պատկանելությունը չեն բացառում նման հնարավորությունը, թեև այդ ենթադրությունը ուղղակի փաստերով հիմնավորելն անհնարին է:

Այսպիսով, պրեպոզիտոս Մուշեղը առաջին Մուշեղ Մամիկոնյանն էր բյուզանդական պետության մեջ: Նրան հաջորդելու են բազմաթիվ Մուշեղներ, որոնք Բյուզանդական կայսրության ավագանու կազմում փայլելու են իրենց պետական ու ռազմական տաղանդով: Մուշեղ անունը (Մոսելե, Մուսելե, Մուսելես) դառնալու է ազգանուն և տեղ է գտնելու անգամ բյուզանդական էպոսում: Մուշեղ (Μουσελ) է կոչվելու Դիգենիս Ակրիտասի (բյուզանդական Սասունցի Դավթի) պապը՝ մոր կողմից:

Մենք փաստեր ունենք ասելու, որ Արկագիոսն ու Թեոդոս II-ը լայն ասպարեզ էին բացել Մամուել Մամիկոնյանի ընտանիքի և նրա շառավիղների առջև: Հարցն այն է, որ Մուշեղը միակը չէր, որ խնդրո առարկա ժամանակաշրջանում բյուզանդական արքունիքում բարձր դիրք էր զբաղվել: Հուստինիանոս I-ի Դատաստանագրքում հիշվում է մի նշանավոր հայ ևս: Դատաստանագրքում տեղ է գտել Արևելահռոմեական կայսրության կայսր Թեոդոս II-ի և Արևմտահռոմեական կայսր Վալենտինիանոս III-ի 442 թ. հրապարակված մի հրովարտակ՝ հասցեագրված պրեպոզիտոս Արտաշեսին (Artaxi praeposito sancti cubiculi), որի իրավունքները ևս շատ լայն էին, քան կարելի է եզրակացնել, ելնելով նրա պաշտոնի հանգամանքից: Հրովարտակը հետևյալն է. «Վայսերակիցներ Թեոդոս և Վալենտինիանոս սրբազան կուրուկլիոնի պրեպոզիտոս Արտաշեսին: Սույն օրենքով մենք սահմանում ենք, որ եթե մեր տնտեսությունների որևէ կողմն, բնակիչ կամ ստրուկ դատարանում գործ հարուցի կամ որևէ մեկի կողմից մեղադրվի քրեական կամ քաղաքացիական գործով, ապա հետաքննությունը պիտի կատարվի ոչ այլ տեղում, այլ միայն ու միայն քո մեծափառության մոտ, մի այլի, որ կրում է սպեկտաբլիս կոչումը և կառավարում է մեր տնտեսությունները: Ոչ մի ուրիշի կարգադրությունը, բացառյալ դատարանի ավելի բարձր կարգադրության, թույլատրելի չէ»²⁰:

Այսպիսով, տեսնում ենք, որ այս Արտաշեսը (Ἀρταξής) սոսկ սենեկապետ չէր, այլ կայսեր տնտեսությունների վերակացու՝ լիազորված դատաստան տեսնելու իրավունքներով: Միանգամայն հավանական է, որ այս Արտաշեսը ևս, ինչպես և վերոհիշյալ Մուշեղը, Մամիկոնյան էր²¹: Նա մասնակցել է 451 թ. գումարված Քաղկեդոնի Չորրորդ տիեզերական ժողովի աշխատանքներին:

²⁰ Corpus Iuris Civilis, vol. II, Codex Iustinianus, recognovit et retractavit Paulus Kreuger. Berolini, 1959, III, 26, 11. Ռ. Գիյանը, թեև մի քանի անգամ հիշում է այս Արտաշեսին, անուշը միշտ աղավաղված ձևով է բերում՝ Araxes, Atarxes. Նա սխալ է նշում նաև հրովարտակի թվականը՝ 422 թ.: Տե՛ս R. Guillaud. Op. cit., pp. 335. 355.

²¹ Արտաշես և Մուշեղ անունները սովորական էին Մամիկոնյանների ընտանիքում: Այդ անուններն էին կրում Վարդան Մամիկոնյանի եղբայր Հմայակի որդիները: Տե՛ս Ղազարալ Փառպեցույ Պատմութիւն Հայոց. Տիգրիս, 1904, էջ 110—111, 143:

արդեն որպես «նախկին պրեպոզիտոս» (ἀπὸ προποσίτου)²² և սենատոր Ասել է, դառնալով «նախկին պրեպոզիտոս», նա շարունակում էր մնալ սենատի անդամ և այնքան վստահելի էր, քաղաքական ու եկեղեցական հարցերում այնքան բանիմաց, որ Մարկիանոս կայսրը 11 այլ սենատորների հետ նրան մասնակից դարձրեց դարակազմիկ աիեզերական Չորրորդ ժողովի աշխատանքներին:

Արդ, ազդակցական ի՞նչ կապ ունի հիշյալ Արտաշես պրեպոզիտոսը ընդհանրական արքունիքում անցյալում իր պաշտոնը վարած Մուշեղի հետ: Նրանք պարզապես պատկանում են միևնույն՝ Մամիկոնյանների նախարարական տոհմի՞ն, թե՞ կոնկրետ Սամուել Մամիկոնյանի ընտանիքին: Ինչ էլ եղած լինի, և՛ Մուշեղին, և՛ Արտաշեսին կարելի է համարել հայկական նախարարական այդ տոհմի նշանավոր ներկայացուցիչները ընդհանրական արքունիքում, որտեղ հեաագայում, հատկապես VIII—IX դդ., նրանք բարձրանալու էին անդամ ընդհանրական գահին (Արաավազդ, Թեոդորա, Միքայել Գ) և զբաղեցնելու էին կայսրության բարձրագույն պաշտոնները (Վարդ Մամիկոնյան, Պեարոնաս Մամիկոնյան և ուրիշներ):

Նշենք նաև, որ ընդհանրական արքունիքում պրեպոզիտոսի պաշտոնը վարել են այլ հայեր ևս, որոնցից ամենանշանավորը Հուստինիանոս I-ի սենեկապետ Նարսեսն էր, որը միաժամանակ ֆինանսական խոշոր դործիչ էր և տաղանդավոր զորավար: Պակաս նշանավոր չէր և Վասիլ Մակեդոնացին՝ Միքայել III-ի արքունիքում:

ПЕРВЫЕ МАМИКОНЫИ ПРИ ВИЗАНТИЙСКОМ ДВОРЕ

Доктор ист. наук Р. М. БАРТИКЯН

Резюме

Накануне раздела Армении между Восточно-римской империей и Сасанидским Ираном (387 г.) армянский царь Аршак III удался из будущей персидской части страны и обосновался на отходившей к империи части Армении. Вместе с ним отпраздничались и многие нахарары, в том числе Мамиконяны во главе с Самуэлом. Они поступили на военную и придворную службу. Между тем в Кодексах Феодосия II и Юстиниана I упоминаются армянские деятели Мушер (Musellios, 414 г.) и Арташес (Ἀρτάσης, 442—451 гг.), достигшие высокой должности препозита (главы ведомства императорских покоев) с широкими финансовыми и судебными полномочиями. Один из них, Арташес, уже сенатор и экс-препозит, участвовал в работе IV Вселенского собора в Халкидоне. Мушер и Арташес на основании своих имен, традиционных в феодальном роде Мамиконянов, считаются принадлежащими к этой знаменитой нахарарской семье. Они оказываются первыми деятелями этой семьи, служившими в Византии. По всей вероятности, они приходятся близкими родственниками упомянутому выше Самуэлу Мамиконяну.

²² S. J. D. Mansi. Sacrorum Conciliorum Nova et Amplissima Collectio. Vol. 6, Graz, 1960, p. 565; Schwartz. Acta Conc. Oec., I, 1, p. 55; I, 2, pp. 70, 84; R. Guillard. Op. cit. Քաղկեդոնի ժողովի արձանագրություններում Արտաշեսը ներկայացված է այսպես. «ὁ μέγαλοπροεσβίτου καὶ ἐνδοξότατου ἀπὸ προποσίτου Ἀρτάξου (լատիններեն բնագրով՝ magnificentissimo et gloriosissimo exproposito sacri cubiculi (Artaxerxes) այսինքն՝ «մեծափառ և ամենափառավորյալ նախկին պրեպոզիտոս Արաշես» (հոնարենում լեզու հնչյունը, այն արտահայտվում է կամ «Յ»-ով կամ «Ջ» (թ) -ով: Արտաշեսը մասնակցեց հիշյալ ժողովի առաջին, երրորդ, չորրորդ և վեցերորդ նիստերին, որոնք կայացան 451 թ. հոկտեմբերի 8-ին, 10-ին, 17-ին և 25-ին: S. J. D. Honigmann. Le cubicalre Urbiculus.—Revue des Études Byzantines, t. VII, fasc. I, 1949, p. 50; R. Janin. Rôle des commissaires Impériaux byzantins dans les conciles.—Revue des Études Byzantines, t. XVIII, 1960, p. 101 sqq.